



大山嫲係吾朋友

探頭，大山嫲在面前，大樹高天天，直直撞對天个心臟去。歸日無麼个風，雨毛屑屑，春天个雨，幼幼像針，對天頂掖落來，洗過身个樹，清淨都分人發呆，呆都分人跌目汁，分人毋記得時間空間个變換，一翻魂，這片山林斯活生疏來咧，逐頭樹都有年紀，逐個樹瘤都有厥成長个故事，樹身个溜苔，係歲月个記號，樞杈个青蕨，係佢包容个產物。

行入山个肚腸內，該真久真久以前个安心感覺，又轉到心肝頭來咧，識恁泥天塌落來有爺哀同恩撐緊，恁泥無愁無慮過日，該種安心个感覺，在這位你做下尋得轉來！輕手輕腳偃行在樹林肚，這下，偃像阿媽子宮內个嬰兒共樣，跔核阿媽个心臟停動伸手伸腳，外背个世界隔層皮肉，既經同偃無相干咧！雨，溜過針樣个樹葉，輕輕掠過頭那毛、面頰，斯像阿媽个手，輕輕拞核凳板攞緊个偃，拞啊拞，拞都偃發夢乜會笑。

地泥下，毋知名个花花草草一簇簇(cob` cob`)，形款百種，花色多樣，一無注意，腳下个嫩花細草斯分你躡去轉轉、綿綿，愛惜這兜幼幼个生命，你會細義，斟酌自家擎腳个同時，係毋係會傷著另外个生命。這下个你，係森林个一部分，若个呼吸同大樹，同花草相通，血脈个流竄同這地土合共下。行瘡咧，樹頭下歇睏故大氣，大氣旨順，身邊知名个、毋知名个鳥，斯嘖嘖啾啾同你交陪，原來對頭到尾都有鳥聲做伴，嘍啾个鳥聲有遠有近，遠个帶核你遊寮樹林，近个係至腹朋友，毋使加講，自然分你試著心神安定。

雨，還係幼幼輕輕黏在人个頭那毛、面頰、衫褲項，細人涿雨歡喜，大人共樣恁歡喜，原來好搞水毋係細人个專利哪！雨毛織出个濛沙煙，分這一大片个樹林，變都像夢中个仙境共樣，發琢愕个同時，你既經變仙變佛咧！

作者：劉玉蕉

☆詞彙學習☆

- | | |
|-----------------------------------|--------------------------------------|
| 【雨毛屑屑】rhi` mo+ seb` seb`：毛毛雨下个不停。 | 【凳板攞緊】den` ban` lai` gin`：長板凳上舒適的躺著。 |
| 【掖落來】rhe` log` loi`：灑下來。 | 【綿綿】mien` mien`：爛兮兮。 |
| 【翻魂】fan+ fun`：回過神。 | 【合共下】gab` kiung` ha`：合在一起。 |
| 【尋得轉來】cim` ded` zhon` loi`：找得回來。 | 【旨順】mang` shun`：還沒調理順暢。 |
| 【溜過】liu` go`：滑過。 | 【嘖嘖啾啾】zi` zi` zio` zio`：形容鳥叫聲。 |
| 【掠過】liog` go`：如梳子般划過。 | 【交陪】gau+ pui`：交朋友。 |
| 【轉轉】zhon` zhon`：倒在地上。 | 【至腹朋友】zhi` bug` pen` rhiu+：知心好友。 |

☆文法學習☆

- 【撞對天个心臟去】dung` dui` tien+ gai+ sim+ cong` ki`：往天的心臟戳過去。「對」在此意指「向、往」，表示動作施作的方向和路徑。文中另有「對天頂掖落來」（從天上灑下來）、「對頭到尾」（從頭到尾），「對」為「從」的意思，也是表示位移的介詞。